

四庫全書

史部

欽定四庫全書

皇朝文獻通考卷一百二十四

羣廟考六

親王世子郡王家廟儀

立廟七間南嚮中五間為堂左右二間隔以牆為夾室後堂楹以北分五室中奉始封之王世世不祧高曾祖禰依世次為二昭二穆昭東穆西親盡則祧由昭祧者藏主於東夾室升昭之二位於一

室以二室奉升祔之主由穆祧者藏主於西夾室
升祧亦如之庭繚以垣南為中門又南為廟門左
右各設側門庭東西廡各三間東藏遺衣冠西藏
祭器樂器廟重簷丹楹采桷綠瓦紅堊壁階祀三
陛各七級門繪五色花草出陛如之焚帛鑪在中
門之內庭東南隅封牲房在中門之外西嚮歲以
四時仲月諏吉祭其始封祖及高曾祖禰五世仲
春之祭並出祧主合食

右廟制祭期

合食之禮既擇日徧告在廟所出子孫成人以上者屆期會行禮府屬官僚咸陪祭先三日戒子弟屬官有執事於廟者讀祝一人通贊一人引贊一人職盥一人掌燎一人職拜禱二人以屬官為之奉香每案一人奉帛每案一人奉爵每位一人以子孫為之主人齋於外寢陪祭執事者咸致齋

右戒執事齋

祭前一日執事者入廟掃除拂拭主人盛服率執事詣廟引贊引主人入自東門

執事者隨入

升東階入

堂左門北面視設神案堂中始封祖專案正位南嚮左東夾祧主共案東位西嚮右西夾祧主共案西位東嚮左次二昭共案東位西嚮右次二穆共案西位東嚮堂中少西設祝案一北嚮東序設香帛案一尊案一均西嚮設盥於東階上既備引贊引主人降詣庭東廊下展樂器祭器閱祭文詣封

牲所視殺牲畢由廟東門出各退

右閱祭器視割牲

祀日昧爽廟中然炬明燈主人率陪祭者執事者

咸朝服

未仕者
盛服

入執事者入堂左門具器陳每案

羊一豕一鉶二簋二籩八豆八

器未備者代
以盤碗時物

隨鑪一鐙二每位七一箸二祝陳祝文於祝案職

香帛爵者陳香盤五尊五帛每位各一爵每位各

三於負序東案上陳胙盤於爵北實帛於篚實酒

於尊實水於盥盆加巾樂工陳樂於西階上

樂器六

六主人位堂檐內正中北面與祭伯叔以上尊行

位東階上兄弟子孫位東階下以世為差世以齒

為序官屬位西階下以爵為序北面祝立祝案西

東面職香帛爵者序立尊案之東西面樂工立西

階上北面通贊立堂門外東楹前職盥者立盥所

燎人立燎鑪隅

右陳設序位

質明子弟之長者二人詣始祖室前啟室奉請神
主安設于几考左妣右又四人分詣東西夾室昭
穆室前各奉請神主安設于几凡昭位考右妣左
穆位考左妣右跪一叩興各退就原位立職拜褥
二人布褥于主人拜位前通贊贊執事者各司其
事引贊引主人陟東階至盥洗所盥手畢通贊贊
就位引贊引主人就拜位立子弟屬官各就位立
通贊贊迎神職香者奉香盤進樂作引贊引主人

詣始祖位前贊跪主人跪贊上香職香者跪奉香
主人三上香興以次詣左右祧位左右昭穆位前
上香畢復位贊叩興主人宗族屬官行二跪六叩
禮興樂止通贊贊奠帛爵行初獻禮樂作執事者
揭尊罍勺挹酒實爵職帛者奉帛職爵者奉爵以
次詣各神位前奠篚于案南獻爵于案北正中畢
皆退樂暫止祝者至祝案前跪奉祭文俟案左引
贊贊跪主人跪陪祭者皆跪贊讀祝祝讀祝畢興

奉祭文奠于始祖案前帛篚內退樂作贊叩興主人率陪祭者三叩興樂止通贊贊行亞獻禮職爵者奉爵各獻于左如初儀贊行終獻禮奉爵各獻于右如亞獻儀既終獻引贊贊主人詣始封祖位前奉福胙二人

以正位前職帛爵者供事

取胙槃詣始祖案前

一抄簋簋之實于槃一取案北正中爵退至主人

右跪踈接福胙二人跪踈于左

以職拜褥者供事

贊跪主

人跪右執事進爵主人受爵拱舉以授左執事進

昨受胙亦如之畢執事者各退贊叩興主人三叩
興退復位通贊贊徹饌辭神樂作執事者徹畢引
贊贊叩興主人率陪祭者行二跪六叩禮興樂止
通贊贊奉祝帛送燎執事者跪奉祝帛香興祝前
香帛後以次由堂中門出送燎所主人避立拜位
旁東面職拜禱者徹禱俟過復位與祭尊屬降階立庭東
西東西面通贊贊望燎引贊引主人降東階詣燎
位東面視燎畢告禮成主人退就庭東立子弟之

長者各詣神位前奉主還室跪三叩闔室退執事
潔滌祭器謹藏之主人率陪祭執事者咸退乃分
胾徧給于族屬

右行禮

時祭之禮堂中設五案始祖考妣正位南嚮高曾
祖禰依昭穆為左右與合食同均南嚮屈日陳設
每案專牲羊一豕一餘牲帛器數及禮節並與合
食儀同

右時祭

時節致薦先一日潔備品物屆日主人夙興率子弟戚服入廟埽除堂宇于始祖暨四親室前設案每案果六槃時羞六槃香槃一每位箸二棧三鑪鐙具陳設畢子弟之長者分詣各神位前啟室主人以次詣各案前跪上香三叩子弟取壺注酒于棧徧獻一巡主人就拜位前行二跪六叩禮子弟少後隨行禮畢乃徹果饌闔室各退

右時節薦新

因事致告屆日夙興入廟啟室薦果盤四庶羞四
主人上香子弟酌酒獻酒及行禮並同薦新儀

右因事告廟

月朔日及望日謁廟禮節與祭告同東西夾室祧
位前每月朔望主人就室前啟室上香二跪六叩
子弟獻酒隨行禮如前儀畢闔室退

右朔望行禮

貝勒貝子宗室公家廟儀

立廟五間南嚮中三間為堂後楹以北分五室奉
始封祖暨高曾祖禰兩旁為夾室奉始封而下親
盡祧主如前位廟及大門均綠瓦紅墜壁階五品
廟不重檐門不備采餘如前制合食始祖專案專
牲羊一豕一東夾室祧主暨二昭專案共牲羊一
豕一西夾室祧主暨二穆亦如之時祭皆專案二
昭同牲二穆同牲視親王邊豆各減二不用樂行

禮皆一跪三叩餘儀與親王同時節則薦果盤四
時羞盤四有事則告朔望則叅果盤二庶羞盤二
薦獻儀節均與親王同

品官家廟儀

立家廟于居室之東一品至三品官廟五間中三
間為堂左右各一間隔以牆北為夾室南為房堂
南檐三門房南檐各一門階五級庭東西廡各三
間東藏遺衣物西藏祭器庭繚以垣南為中門又

南為外門左右各設側門四品至七品廟宇三間
中為堂左右為夾室為房階三級東西廡各一間
餘制與三品以上同

世爵公侯伯子視一品男以下按品為差等

八九

品廟三間中廣左右狹階一級堂及垣皆一門庭
無廡以篋分藏遺衣物祭器陳于東西房餘與七

品以上同

在籍進士舉人視七品恩拔歲貢生視八品

堂後楹北設四

室奉高曾祖禰四世皆昭左穆右妣以嫡配南嚮
高祖以上親盡則祧由昭祧者藏主于東夾室由

穆祧者藏主于西夾室遷室祔廟均依昭穆之次

東序西序為祔位伯叔祖之成人無後者伯叔父

之成人無後及其長殤

至十六歲至十九

者兄弟成人無後

及其長殤中殤

至十二歲至十五

者妻先殤者子姓成人無

後及其長殤中殤下殤

凡十一歲至

者皆以版按行輩

墨書男統于東女統于西東西嚮歲以春夏秋冬

仲月擇吉致祭戒子弟讀祝文一人贊禮一人執

爵每案一人分薦祔位東西各一人凡在廟所出

子孫年及冠以上者皆會行禮

右廟制祭期

先祭三日主人及在事者咸致齋前一日主人率子弟盛服入廟視潔除拂拭畢執事者于各室前設几几前供案堂南總香案一鑪擎具祔位東西各統設一案設祝案于香案之西設尊爵案于東序設盥盤于東階上視割牲一品至三品官羊一豕一四品至七品官特豕八品以下豚肩不特殺

視滌祭器三品以上每案組二鉶二敦二簋六豆
六七品以上簋四豆四八品以下簋二豆二皆組
一鉶敦數同
代以時用
梔盤者聽辨祭器之實組實牲體鉶
實羹敦實飯簋實時果餅餌魚腊之屬豆實炙臠
時蔬之屬

右致齋具牲饌

屆日五鼓主人朝服與祭執事者盛服入廟主人
俟于東階下族姓俟庭東西以昭穆世次為序執

事者陳鑪鐙于供案南陳尊爵于東序案

代以壺
殘者聽

陳祭文于祝案實水于盥盤加巾主婦率諸婦盛

服入詣爨所視烹飪羹定入于東房治籩豆之實

陳鉶敦匕箸醯醬以族質明子弟之長者盥詣各

室前跪一叩興啟室奉主以次設于几昭位考右

妣左穆位考左妣右分薦者設東西祔位畢贊禮

立堂東檐下西面諸執事分立東西序端相嚮贊

就位主人升自東階盥詣中檐拜位立族姓行尊

者立于東西階上卑者立于階下皆重行北面贊

參神主人入堂左門詣香案前跪執事二人

司爵者充

一奉香盤一挹尊酌酒詣主人左右跪左進香主人三上香右進爵主人酌酒于地以爵奠于案興退出右門復拜位及族姓行一跪三叩禮贊初獻主婦率諸婦出于房薦匕箸醯醬于几前案北跪一叩興徧及祔位退入于房庖人解牲體實于俎執事者奉以升各薦于供案主人詣高祖考案前

執爵者奉爵主人獻奠于正中跪叩興以次詣曾
祖祖禰案前獻爵如前儀分薦者徧獻祔位酒訖
退立于拜位贊讀祭文主人跪族姓皆跪祝詣祝
案之左跪讀祭文曰維某年月日孝孫某謹告于
某考某官某府君某妣某氏之靈曰氣序流易時
維仲春夏追感歲時不勝永慕謹以潔牲庶品染
盛醴齊敬薦歲時以某親某氏等祔食尚饗讀訖
興以祭文復于案退主人以下一叩興贊亞獻庖

人納羹飯于東房主婦率諸婦和羹實于鉶飯實于敦出薦于案及腊肉炙載徧跪叩興退如初禮主人獻爵于各位之左贊三獻主婦率諸婦出于房薦餅餌果蔬叩退主人獻爵于各位之右分獻者徧獻祔位酒均如初獻儀贊受噉祝取高祖供案酒饌降至香案旁主人詣香案前跪祝代祖考致噉于主人主人啐酒嘗食反器於祝接以興主人一叩興復位贊送神主人以下一跪三叩興贊

望燎祝取祭文由中門出送燎主人退避東階下行革長者咸降階主人詣燎位視燎畢與祭者出主人率子弟納神主上香行禮徹祭器傳于燕器潔滌謹藏之闔門各退

右祭儀

日中乃餽三品以上時祭徧舉四品至七品春秋二舉八品九品一舉庖人執酒饌僕人布餽席于堂東西北上陳醢醬于席西隅琖牒匙箸之屬皆

辨與祭者尊卑咸在從曾祖諸父居東第一席從
祖諸父居西第一席諸父次東一席諸昆弟次西
一席諸子諸孫在東西之末各一席序定主人肅
尊者入席從曾祖諸父即席從祖諸父東嚮尊者
肅揖就位諸父東嚮揖西嚮揖就位諸昆弟揖如
之復揖諸父就位諸子揖如諸父復揖諸昆弟諸
孫揖如諸子皆就位主人離席僕執壺實酒從主
人酌諸尊長酒每酌一人肅揖尊長答揖徧就位

子弟之長者離席僕人執壺從敬酌主人諸子弟咸避席揖主人答揖復位主人命諸子弟徧酌酒席中少者執壺各酌于其長者既徧皆坐主人興舉酒請于尊長坐尊長乃嘗酒卒爵衆嘗酒卒爵僕人進食主人興請于尊長坐尊長舉箸嘗食乃皆食每進食子弟間行酒三巡長幼獻酬交錯飲無算爵湯飯畢長者起主人請留長者告飽遂離席諸子弟咸離席以次出主人送長者于門外入

命徹席餽庖人僕人皆盡

右餽

歲逢令節薦新物一二三品官每案時果四庶羞
四羹飯具四品至七品官每案時果二庶羞四八
品九品官每案時果庶羞各二餘同是日夙興主
婦潔辦果饌主人盛服率族姓子弟入廟然鐙灑
埽設案室前訖盥洗啟室子弟分陳匙箸壺瓊之
屬于案北主人序立于香案前族姓以次序立于

主人之後主人跪焚香訖叩興子弟奉果羞從主人詣高祖考妣位前薦果薦羞畢子弟舉壺取琖酌酒進于主人主人奠酒訖子弟復奉羹飯從主人薦羹飯訖以次詣各案薦奠如前儀退至香案前率族姓子弟一跪三叩興子弟徹饌主人闔室皆退

右時節薦新

月朔望日主人豫備茶食之屬每案二器主人夙

興盥洗盛服率族姓子弟入廟灑掃潔神案啟室
序位于香案前主人跪焚香訖叩興子孫奉食及
茶從主人詣各神案前以次供食供茶畢退復位
率族姓子弟行禮如時薦之儀徹主人闔室皆退
右朔望獻茶

恭遇

覃恩

制書至主人以黃紙恭謄一通奉于廳事正中諏吉日

擇同姓或戚族已仕者一人宣

制戒子弟引贊二人通贊二人徧戒族姓屆期會行禮

前一日齋戒備告文祝文牲饌視新贈之爵為等

至日夙興灑埽堂宇供張設饌案

以追贈所及世數為準

香

案施如儀設改題神主案東西嚮使人速宣

制者主人朝服率子弟盛服入廟諸與祭者皆會主人

詣贈主室前啟室焚香跪子弟一人奉告文跪子

主人之左讀告文辭曰維某年月日孝子某

或稱孝孫

宜隨謹告于某考某官府君某妣某封某氏之靈曰
某幸得列于位恭奉

恩命

贈及先人敬請神主祇受

制書改題奉祀謹告讀訖興主人叩興奉考主子弟奉
妣主及族姓出廟門踈于道左宣制者朝服奉

制書前行二人導行至廟衆跪接

制書入中門升中階南嚮立衆皆隨入至階下序立主

人奉考主在東子弟奉妣主在西族姓重行立其
後皆北面通贊分立東西柱前贊宣

制主人以下皆跪聽宣

制畢奉主行三跪九叩禮衆隨行禮宣制官以

制書供香案架上主人奉主置改題案上揖勞宣制者

宣制者答揖復揖辭降自西階主人從至廟大門

外揖送入改題神主爵位訖奉主復位序立祭神

讀祝三獻爵如時祭儀祝辭曰維某年月日孝子

某謹告于顯考某府君先妣某氏之靈曰某恭承
庭訓列位于

朝仰荷

皇仁推恩所生贈考為某銜妣為某銜感念先澤祿弗
逮養茲以焚黃謹備牲醴用申薦告尚饗祭畢焚
黃并祝文奉主復于室闔室出主人以下皆退頌
胙于宣制者餽屬姓如儀

右焚黃告祭

庶士

貢監生員有頂帶者

家祭儀

為龕于寢堂之北以板別為四室奉高曾祖禰皆以妣配位如前儀南嚮前設香案總一服親男女成人無後者按行輩書紙位祔食男東女西相嚮事至則陳已事焚之不立板歲以春夏秋冬節日出主而薦粢盛二盤肉食果蔬之屬四器羹二飯二前則主人及與祭者咸致齋薦之前夕主婦吉服治饌于房中厥明夙興主人吉服率子弟設香

案于南然燭置祭文堂北設供案二昭東穆西均以妣配位均南嚮設祔案于兩序下各一男東女西東西嚮主人以下盥奉木主設于案設祔位于兩序案訖主人東階下立衆各依行輩東西序立主人詣香案前上香畢率在位者一跪三叩興主婦率諸婦出房中薦匕箸醯醬跪叩如儀退子弟奉壺諸人詣神案以次斟酒薦熟訖皆就案南跪叩興子弟薦祔位畢主人跪在位者皆跪祝進至

香案之右讀祭文

辭見官品祭禮減潔牲二字餘同

訖興退主人

以下叩興再獻主婦薦飯羹三獻主婦薦餅餌時

蔬主人斟酒跪叩均如初儀畢主人率族姓一跪

三叩興祝取祭文及祔食紙位焚于庭衆出主人

納木主徹退日中而餽春一舉布席于堂東西北

上陳椅棹匙箸如其人數傳祭食于燕器熱酒饌

族姓至主人肅入序位以行輩年齒為等旅揖即

席進酒饌酬酢如禮湯飯畢長者離席告退主人

送于門外諸子弟皆隨以出徹僕人餽餘食皆盡
月朔望日主人及家衆夙興盥洗啟寢室然燭詣
香案前依行輩序立主人上香訖子弟奉茶主人
獻茶復位率衆一跪三叩興徹茶闔室衆退若家
有吉事主人盥洗然燭焚香以其事告行禮如朔
望儀

庶人家祭儀

為龕于正寢之北奉高曾祖禰神位歲逢節序薦

果蔬新物每案不過四器羹飯具其日夙興主婦
治饌主人率子弟設案然鐙啟室奉神主于案上
以昭穆序主人立于香案前家衆序立于主人下
以行輩為先後主人上香一跪三叩興主婦陳匕
箸醯醬薦羹飯果羞跪叩如儀主人酌酒進于各
位前凡三次皆跪一叩興畢主人率衆一跪三叩
興納主于室徹退日中衆餽神食歲一舉論行輩
先後同行序齒列坐酒行飯已肅揖以退月朔望

日供茶然香鐙行禮告事亦如之均與庶士儀同

皇朝文獻通考卷一百二十四

欽定四庫全書

皇朝文獻通考卷一百二十五

王禮考一

臣等謹案周官宗伯掌邦禮治神人和上下禮之大綱有五曰吉凶軍賓嘉至於節文度數之詳則記所謂經禮三百曲禮三千是也禮之用通乎上下故自王朝達乎諸侯大夫及士庶人咸共由之而議禮制度考文則歸於首出庶物之天子焉春

秋以降禮經殘缺漢興高堂生傳士禮十七篇即今所謂儀禮而河間獻王所獻周官禮分職三百六十凡祭祀朝聘會同賓客燕饗與夫圭璧車旗冠冕服章無不備具蓋即王朝之通禮而後世六典會要經世大典會典諸書實權輿於此朱子撰儀禮經傳通解分王朝禮邦國禮鄉禮學禮家禮之目其王朝禮十四卷則朝覲而外分土制國設官建侯名器師田刑辟咸附入焉夫臣庶以下冠

婚喪祭之禮有歷久而廢及不為限制者本無沿革不煩紀載故馬端臨文獻通考特立王禮一門取其通乎古今而代有沿革者若所載朝儀巡狩田獵冠冕服章圭璧符璽車旗鹵簿及國恤山陵諸條蓋本諸朱子儀禮經傳通解之王朝禮而畧為變通焉我

國家肇基東土

太祖登極建元首創朝儀

太宗式闢疆宇改元定號

郊壇

廟

朝之典以次修舉鹵簿冠服秩然有等開國規模洵稱
宏遠矣

世祖一統中外制禮作樂參酌古今之宜而因革之省前
代之煩文布

聖朝之新憲巍乎煥乎儀文大備

聖祖

世宗加意典禮次第修明康熙中

命儒臣修

大清會典雍正中復加增修煌煌鉅典小大率由我

皇上敬

天尊

祖頒朝治官之典弗懈益虔

臨御之初

敕修

大清通禮

大清會典宣布海內至於禮器一書復加釐定按圖系
說固莫不美善同歸敷錫罔暨矣數十年來猶以
舊儀沿襲恐有未協訓行爰經

睿慮務損益之得中悉荷

裁成極推行之盡利舉凡

皇朝典禮郁郁彬彬理器該而經曲貫遐哉尚已臣等

嘗考三代以下漢叔孫通之朝儀其詳既不可盡
考若唐之開元禮宋之政和五禮新儀元之典章
明之集禮又皆有文無實煩冗而不適於用我
朝

列聖相承典章明備以闕雎麟趾之心行周官周禮之法
宜古宜今足為億萬世遵守今依馬氏例編次朝
儀以下等禮又增入

登極上

尊號

徽號

冊立

冊封

皇子公主婚嫁等儀凡三十卷為王禮考云

朝儀

臣等謹案朝會之儀所以正名分辨等威萬國朝宗共球畢集用昭中外一統之盛馬氏王禮考首

載朝儀今循其例首

皇帝三大節朝賀次常朝次

御門聽政次

皇太后

皇后三大節朝賀儀文彬彬乎盛矣

元旦朝賀

臣等謹案元旦者一歲之始冬至者一陽之始聖節者人君之始帝王所以泣萬方臣子所以尊君

上皆於是觀禮焉

本朝定為三大節元日典禮尤重今列為朝儀之首
云

天命元年正月丙辰朔

太祖高皇帝御殿行慶賀禮

儀注恭戴登極門
每年受朝不備書

始制朝儀

天聰元年正月己巳朔

太宗文皇帝率諸貝勒大臣拜

天畢

御殿受朝是日諸貝勒文武羣臣各按旗序行三跪九叩
頭禮大貝勒代善阿敏莽古爾泰以兄行
命列坐左右凡朝會之處悉如之

國制每於除夕元旦陳樂舞設大宴是日以

太祖喪撤樂停宴

六年正月己亥朔

御殿受朝賀次日筵宴先是五年十二月丙申

諭八旗諸大臣曰元旦朝賀堂陛之儀宜於整肅茲允衆

議先令八旗諸貝勒行禮察哈爾喀爾喀諸貝勒次之
滿洲蒙古漢官率各旗官員次之官員行禮時先總兵
官固山額真次副將次叅將遊擊護軍叅額真侍衛又
次備禦各分班序行禮是日

上率諸貝勒拜

天畢

御殿

上兩旁設二榻命大貝勒代善阿敏莽古爾泰坐諸貝勒

先朝賀畢令議政諸貝勒入殿內左右列坐次蒙古諸貝勒及總兵官以下各行朝賀禮次朝鮮使臣朝賀陳貢物於庭朝罷

上以兄禮詣代善第拜之舊例國人朝見

上與三大貝勒俱南面坐受八旗貝勒率大臣朝見不論旗分惟以年齒為序至是更定八旗依旗分以次朝見

十一月丁未

諭六部諸貝勒曰國家初設六部時滿洲蒙古漢人各部承政叅政分為二行定有班次近見朝會之時坐立無序尊卑紊越如此體統何由而肅乎嗣後爾等宜按次序班各加整飭

崇德元年定元日進慶賀表箋奏樂

又定元旦前三日至第九日止各官皆朝服

順治元年正月庚寅朔

世祖章皇帝御殿受朝賀停筵宴免上表並年例進獻

令和碩禮親王代善勿拜

二年十二月庚子定元日前後七日王公百官皆朝服

丙午更定朝儀凡元旦慶賀

皇上先御武英殿內大臣兩翼護軍統領護軍叅領侍衛等內三院都察院大臣及禮部執事各官行禮畢皇上御太和殿衆官跪迎及陞座諸王貝勒貝子公等奉表於階上行禮次兩翼滿洲蒙古漢軍各官次漢

文武百官次朝鮮國進貢使臣次外國諸王使臣
次土魯番回回哈密衛人及董蘇固爾地方喇嘛
等行禮

八年四月戊申定三大節禮儀凡元旦冬至

上詣

皇太后宮行禮畢還宮

陞太和殿鳴鐘鼓作樂諸王文武百官行慶賀禮

六月壬子禮部議定凡遇大禮

上朝服御太和殿諸王以下文武羣臣朝服集

太和殿前行禮諸王貝勒由

午門兩傍門行固山貝子以下文武羣臣由

午門側兩掖門行諸王貝勒由

太和門兩傍門行固山貝子以下文武羣臣由

昭德門及

貞度門行每月常朝及奏事除中門外各門俱隨便

行走

九月己卯頒慶賀表箋式於各藩王及督撫提鎮等衙門

是年定朝會賜羣臣坐之儀凡大朝常朝行禮畢賜羣臣坐郡王以上進

殿內貝子以下在丹陛上百官在丹墀內均照班次跪行一叩頭禮坐

皇帝進茶王公百官均就坐次行一叩禮光祿寺執事官授羣臣茶羣臣受茶就坐次行一叩禮飲畢復行

一叩禮至十二年十月禮部復議大朝貝子公以上同諸王行禮畢進

殿內兩傍列坐從之

九年設糾儀司員凡

御殿日設禮部司官四人於王公行禮處設吏部禮部司官各四人於百官行禮處糾儀

康熙元年定王公百官班位凡大朝及常朝齊集親王世子郡王長子貝勒貝子八八分鎮國公輔

國公在丹陛上序立不入八分公民公侯伯鎮國將軍都統子尚書第一班輔國將軍護軍統領副都統前絳統領侍郎男步軍翼尉大九卿第二班奉國將軍一等侍衛護衛叅領輕車都尉步軍協尉小九卿郎中第三班奉恩將軍二等侍衛護衛騎都尉佐領員外郎科道官第四班三等侍衛護衛雲騎尉鳴贊官主事步軍尉第五班護軍校驍騎校筆帖式第六班其次各照職銜不論加級違

者察處

十六年重定百官班位凡大朝及常朝齊集滿官
公侯伯鎮國將軍都統尚書左都御史子及凡一
品官第一班輔國將軍護軍統領前鋒統領步軍
統領副都統侍郎學士左副都御史通政使司通
政使大理寺卿詹事府詹事男凡二品官第二班
奉國將軍步軍翼尉長史叅領一等侍衛護衛太
常寺卿太僕寺卿光祿寺卿祭酒通政使司副使

大理寺少卿少詹事侍讀學士侍講學士侍讀侍
講庶子洗馬鴻臚寺卿理事官郎中給事中監察
御史太常寺少卿太僕寺少卿輕車都尉及凡三
品官第三班奉恩將軍步軍協尉佐領司儀長二
等侍衛護衛欽天監監正內閣侍讀司業光祿寺
少卿鴻臚寺少卿通政使司參議中允員外郎騎
都尉及凡四品官第四班三等侍衛護衛雲騎尉
步軍尉贊善欽天監副太常寺丞主事大理寺正

光祿寺署正都察院經歷及凡五品官第五班護軍
校驍騎校通政使司知事大理寺評事鳴贊司務
司庫等各職掌官及六品筆帖式第六班七品官
及七品筆帖式第七班八品官八品筆帖式第八
班九品官九品筆帖式第九班漢官尚書左都御
史第一班侍郎學士左副都御史宗人府府丞通
政使大理寺卿詹事第二班太常寺卿順天府尹
太僕寺卿光祿寺卿通政使司副使大理寺少卿

少詹事講讀學士祭酒庶子侍讀侍講洗馬鴻臚
寺卿太常寺少卿順天府丞第三班通政使司叅
議大理寺丞中允贊善司業光祿寺少卿鴻臚寺
少卿修撰編修檢討庶吉士給事中御史吏部司
官五部郎中第四班五部員外郎宗人府經歷順
天府治中欽天監正太醫院使光祿寺丞第五班
五部主事都察院經歷都事理藩院判大理寺正
欽天監副太醫院判太常寺丞京府通判京縣知

縣兵馬司指揮欽天監五官正鴻臚寺丞大理寺
副光祿寺署正第六班大理寺評事太常寺博士
中書科中書內閣典籍撰文中書辦事中書各部
司務大理寺司務通政司經歷太常寺典簿京縣
丞兵馬司副指揮鑾儀衛經歷詹事府主簿正字
錄事翰林院典簿待詔京衛經歷欽天監五官靈
臺郎祠祭署奉祀等官第七班五經博士國子監
丞博士典簿助教學正學錄典籍理藩院知事欽

天監主簿五官保章正太醫院御醫太常寺協律郎等八品官第八班理藩院副太常寺贊禮郎鴻臚寺鳴贊等九品官第九班武職叅將遊擊在三班守備等官在四班千總等官在五班隨旗上朝官照在部院衙門職掌品級其降級上朝官照所降品級部院衙門官有兼銜則從其銜之大者二十年設滿漢糾儀御史凡

御殿日設滿御史東西各二人於王公行禮處設滿御史

東西各二人漢御史東西各二人於百官行禮處
侍立糾儀

雍正元年正月辛巳朔

世宗憲皇帝詣

壽皇殿行禮不陞殿受賀前期禮部等衙門議言帝王即位首重元正元者歲之始正者月之始也故曰春
王正月所以紀即位之始也雍正元年為

龍飛之首歲

皇上孝思罔極卽不陞殿受賀而羣臣進表之禮斷不可缺臣等請雍正元年元旦在京諸王百官恭進

皇太后表文

皇上表文仍照例呈覽交與內閣收貯將此表文式頒示朝鮮直隸各省於雍正二年具奏冬至

萬壽節雖不受賀其表文亦照例具奏交與內閣收貯則孝思已盡而國典亦全矣從之

二年正月丙子朔

御殿受朝賀宣表

始定漢官分東西班禮部奏准凡朝期漢官以吏
部禮部刑部宗人府通政使翰林院詹事府太常
寺光祿寺鴻臚寺國子監吏科禮科刑科內閣中
書欽天監太醫院列左班戶部兵部工部都察院
大理寺鑾儀衛太僕寺四譯館中書科戶科兵科
工科行人司乾隆十三年裁順天府五城兵馬司三營列
右班均立於鑾駕之末聽贊唱依次排班行禮

三年正月庚子朔

御殿受朝賀表文不宣讀先是二年十二月壬申禮部奏

元旦受賀禮儀

上謂大學士曰朕即位之初諸王大臣奏請元旦陞殿受賀至再至三朕無可如何准於次年受賀今年元旦陞殿讀表時朕聽之不禁心傷淒然垂淚今尚未過三年著停止行禮壬午諸王大臣復請陞殿行禮

上曰諸王大臣雖請朕俯順輿情亦當思仰體朕意朕意

以為行慶賀禮以示萬國不若盡孝道以示天下二年
元旦因行元年之禮故允所請去年允行長至之禮因
聖祖仁皇帝配

天大典朕不得已勉從衆請至於御殿進表受賀不比尋
常之御殿謝恩行禮也朕降此諭旨諸王大臣著即遵
行已丑諸王大臣又奏孝經言天子之孝得萬國之懽
心以事其先王今元旦陞殿受賀錫福兆人

聖祖仁皇帝在天之靈必為欣慰與孝經之義相合得

旨諸王大臣引經據典陳懇再三著准行禮其表文但行呈進不必宣讀

七年十二月

諭羣臣曰元日朝賀凡三品以上之大臣年逾七十者不必隨班行禮俟百官朝賀禮畢朕還宮後至乾清門行禮

乾隆元年正月丙申朔

上御太和殿中和韶樂設而不作諸王公文武各官朝

鮮使臣進表行慶賀禮表文不宣讀

十二月壬戌停止次年元旦朝賀禮部奏乾隆二年元旦禮儀

上曰今歲元旦乃朕御極元年朝正大典禮制攸關且在

皇考大事百日之外是以勉從諸王大臣所請御殿受朝
明年元旦尚在二十七月之內陞殿受賀朕心不忍
不必陞殿行禮

二年十二月定大學士於

殿內

賜茶

諭曰朕御太和殿向來大學士皆立於殿外檐下即於殿外賜茶嗣後立位仍照舊例賜茶時令坐於殿內領侍衛內大臣之上至十五年復

諭曰嗣後大學士坐次仍著在領侍衛內大臣之上協辦大學士事務尚書著在領侍衛內大臣之下署領

侍衛內大臣之上

更定漢官東西班位以吏部戶部禮部列左班兵部刑部工部列右班至十一年復定六科班次隨六部分列吏科戶科禮科列左班兵科刑科工科列右班

七年令外省官在京者一例入班行禮凡外省文官督撫以下道府以上武官將軍都統以下協領副將以上或入

覲或奉調在京者遇

御殿日一例入班行禮總督加尚書銜者列六部尚書
之末巡撫加侍郎銜者列侍郎之末加副都御史
者列副都御史之末布政使按察使列小九卿之
末道府列部郎之末將軍都統提督列都統之末副都
統總兵官列副都統之末協領副將列叅領之末
八年重定

殿內

賜坐儀四品以下官停止

賜茶是歲奉

諭旨嗣後御殿及筵宴日殿內止大臣賜坐侍衛等均著侍立不必賜坐賜茶時若侍衛輪流奉授不無舛錯遺漏嗣後授茶時著禮部前期取應坐之王公大臣數目每一人令侍衛一人授茶仍依次接回庶不致舛錯遺漏尋禮部議奏

御殿日除文官三品武官二品以上照舊

賜茶其四品以下官惟

殿內之記注官丹墀內之外國使臣

賜坐

賜茶其餘百官但

賜坐停止

賜茶從之

十六年十二月重定百官朝班禮部奏准國家建
官列品各有正從次第秩然順治初文官階未置

一品惟加師保及宮衛者充之每常朝尚書左都御史以二品居第一班侍郎內閣學士副都御史通政使大理寺卿以三品居二班祭酒通政副使大理太常太僕少卿鴻臚卿以四品居三班其下五品居四班六品居五班位次率進本階一等此舊典所載朝班之位也雍正八年改大學士為正一品尚書左都御史從一品侍郎內閣學士從二品乾隆十五年又改侍郎為正二品翰林院掌院

學士為從二品是今尚書左都御史之居一班侍郎學士之居二班適與本階相稱而副都御史以下班位仍舊實為越次臣愚以為官品既已更改則朝班亦當釐定嗣後恭遇

御殿日及每月常朝百官班次請皆依品序列正從一品為一班二品為二班遞至九品分為九班毋許越次至翰林詹事為文學侍從之臣體統視庶僚為優但舊典以五品列三班六七品列四班亦為

太過今擬少詹事侍讀學士侍講學士仍舊列三班庶子侍讀侍講洗馬國子監祭酒改列四班中允贊善司業修撰編修檢討庶吉士改列五班其京營武職朝班及外省提鎮等官遇事入朝者請照康熙二十二年所定直省行禮班位提督二班總兵官三班副將叅將四班遊擊五班守備六班千總等官七班均附於右翼各班之末

十八年十一月停止外省藩臬等官進表箋慶賀

諭曰元旦長至萬壽三大節外省文官臬司以上武官副將以上例得隨進表箋稱賀朕思督撫提鎮封疆大吏事皆專達表賀為宜藩司副將既不得專達章疏其由督撫附進表箋亦可不必且不過由部送閣存貯並不呈覽此亦向來虛文陋習甚無取焉其概行停止

二十二年五月增設朝會糾儀官員禮部奏准凡遇

陞殿日仗外百官班次恐有參錯不齊應於儀仗之後
昭德

貞度二門階下東西各設滿漢御史二人禮部司員
二人侍衛二人嚴行稽察

二十四年七月設紅漆木牌於仗外百官班次禮
部議准凡大朝之期百官仗外侍立各有品級班
次但從前未經標示一定地位恐百官站立不無
參差斷續嗣後遇

陞殿日交鴻臚寺於儀仗之外照常朝坐班例設立紅漆木牌預先按次排班如有參差斷續錯綜者令糾儀官查叅

二十七年八月定慶賀題本式通政使司奏言此次貴州巡撫喬光烈慶賀

萬壽本章面用黃綾內加黃簽與各省督撫互異請欽定式樣以昭畫一得

旨嗣後慶賀本章著照喬光烈之式

二十八年二月更定慶賀題本式通政使司奏准
凡恭逢慶賀之期在京各部院衙門陳奏尋常事
件俱用黃摺況慶賀本章事關大典請嗣後恭遇
慶賀

皇太后

皇上本章及貼黃俱用黃紙其面頁仍用黃綾黃簽本
內及貼黃俱毋庸另行加簽

皇帝三大節表式及朝賀儀先期諸王大學士率京朝

官直省文武率闔屬官具賀表豫送禮部其式曰
具官臣某等誠懼誠忤稽首頓首

上

賀伏以

表聯隨時撰擬恭惟

皇帝陛下

隨時撰擬臣等恭遇

熙朝欣逢元旦恭遇

萬壽聖節則云欣逢
聖誕冬至則云欣逢長至
伏願

隨時
撰擬

臣等無任瞻

天仰

聖懼忭之至謹奉

表稱

賀以

聞禮部屆期具疏請

皇帝御太和殿受賀

制報曰可

右表賀儀式

三十五年六月停止五經博士赴京朝賀

諭曰向遇國家慶典衍聖公以及五經博士俱有來京朝賀之例今思五經博士雖膺章服之榮究與各省紳士無異且其品秩不崇非若衍聖公之身膺顯爵者可比伊等趨詣闕廷既無由一體延見加恩徒令其跋涉往來致滋糜費甚無謂也嗣後五經博士凡

遇慶典俱在各本籍隨班行禮其來京朝賀之例著
永行停止至行聖公孔昭煥昨已傳諭令其今年且
不必來京將來遇有朝賀之事並著先期奏請候旨
遵行著為令

恭遇

皇上萬壽大慶聖節自初一日起至三十日止一月內
王公百官應衣蟒袍其前後各三日內常朝處仍
衣朝服均前期具奏請

旨通行在京衙門及各直省每遇元旦節前後各三日
王公百官常朝處衣朝服辦事及入朝奏對咸衣
蟒袍禮部豫於秋季封開印本內題明

右朝服

凡王公等進

午門親王隨從六名親王世子郡王五名郡王長子
貝勒四名貝子三名公二名進

太和門親王親王世子隨從三名郡王郡王長子貝

勒二名貝子公一名恭遇朝賀

皇帝陞殿王以下公以上止用護衛內一人攜坐褥

右王公等隨從

恭遇

皇帝御殿受賀先期具題請

旨每逢朝期行知步軍統領衙門屆日於曉鐘時即啟
正陽門俾城外居住各官早入

右戒期

至日五鼓鑾儀衛率官校入陳

法駕鹵簿親軍護軍旗尉民尉各服其服禁語譁者察
不整備者樂部率和聲署陳中和韶樂於

太和殿檐前設丹陛大樂於

太和門檐下有司設表案於

殿內東楹之南西向設筆硯案於

殿內西楹之南東向先期行工部取表文匣行鑾儀

衛取舁亭校尉并令派員約束行樂部派署史備

導迎樂均前一日赴部住宿至是禮部儀制司官
奉中外臣工賀表載於亭鑾儀衛校自部舁行香
亭前表亭後鼓吹前導導迎樂作奏禧平之章由
東長安門至

午門外亭止儀制司官奉王以下在京文武官賀表
進

太和殿設東楹案上內閣官奉筆硯設西楹案上皆
退

右陳設

辨侍班官位前引內大臣立

御座前東西面後扈內大臣在

御座旁左右僉立豹尾班侍衛佩刀侍衛在

御座後左右翼立記注官立

殿內西三楹東面北上內閣大學士學士翰林院侍

讀學士侍講學士詹事府詹事少詹事立東檐第

三柱西面都察院左都御史副都御史樂部大臣

立西檐第三柱東面皆北上辨執事官位樂部典
樂一人立檐東植麾之次西面和聲署領樂官六
人分立東西樂懸之次東西面宣表官一人立東
檐侍班官之次鴻臚寺鳴贊二人立東檐第一柱
西面二人立西檐第一柱東面鑾儀衛傳鳴鞭官
立丹陛西階每重二人東面糾儀御史二人立西
檐第三柱東面御史四人禮部司官四人立丹陛
之南御史四人立丹墀之北皆北上東西面又御

史四人吏部禮部司官各四人在丹墀之南東西
僉立辨百官朝位丹陛上東西各二班親王郡王
貝勒為一班貝子八分公為二班按翼序列左
翼立位西面北上拜位北面西上右翼立位東面
北上拜位北面東上丹墀內不入八分宗室公以
下暨公侯伯子男文武各官立位在鹵簿外直丹
陛東西隅東西各九班東西面北上滿官按翼為
序左翼在東右翼在西漢官吏部戶部禮部宗人

府通政司翰林院詹事府太常寺光祿寺鴻臚寺
國子監吏科戶科禮科內閣中書舍人欽天監太
醫院以次從左翼之南兵部刑部工部都察院太
理寺鑾儀衛太僕寺中書科兵科刑科工科順天
府京縣五城兵馬司三營以次從右翼之南皆正
從同班依品為序拜位在鹵簿內直東西階東西
列品級山自北而南各十有八正從異從依品為
序皆北面東班西上西班東上外藩蒙古王公等

位次宗室親王郡王貝勒子公之下哈薩克回子
王公等俱入蒙古王公班次以其等為序惟外國
貢使在西班後另為班次以朝鮮國領班

右序班位

質明王公暨文武一二品官從

皇帝朝於

皇太后宮三品以下官會

午門闕下均行禮畢

儀詳
慈寧宮朝賀

鴻臚寺卿序定王

公班次鳴贊序定一二品官班次均由右翼門入
引王公至丹陛上引一二品官至丹墀東西鳴贊
序定三品以下官班次於

午門東由左掖門入

昭德門西由右掖門入

貞度門均引至丹墀司賓序班序定外國陪臣班次
引入西班百官後均依前位立糾儀官暨執事官
咸入就位欽天監官於

乾清門報時禮部尚書侍郎詣

乾清門奏請

御殿後扈內大臣二人率豹尾班執槍侍衛十人佩刀

侍衛十人於

乾清門外禮部尚書侍郎於門階下前引大臣十人
於

太和殿後階下咸左右序立祇候

午門鳴鐘鼓

皇帝禮服乘輿出宮禮部尚書侍郎恭導後扈內大臣
從由

保和殿

御中和殿陞座鴻臚寺官引侍班導從各官至

殿前接班行三跪九叩禮

不贊

畢侍班官先趨出就位

皇帝駕興禮部尚書侍郎暨前引大臣恭導後扈如初

中和韶樂作元旦奏元平之章

萬壽聖節奏乾平之章冬至奏遂平之章

皇帝御太和殿陞座樂止導從官各就位鑾儀衛官進至中階之右三傳鳴鞭丹墀內三鳴鞭退復位鳴贊官贊排班丹陛樂作奏慶平之章鴻臚寺分引王公就拜位引文武百官由鹵簿南轉入拜位皆東西按班北面序立贊進皆進贊跪皆跪樂暫止贊宣表宣表官自東檐入

殿左門至東案前奉表出至檐下正中北面跪大學士二人左右跪展表宣表官宣畢仍奉表進復於

案退樂作贊叩興王公百官行三跪九叩禮興鴻
臚寺官按班引退皆復原位立樂止又贊進鴻臚
寺官引外國陪臣就西拜位立丹陛樂作奏治平
之章

凡丹陛樂辭
三大節皆同

贊行三跪九叩禮畢引退復位

立樂止

若數國並朝先朝鮮
餘國以次遞引行禮

皇帝既受賀

賜羣臣及外國陪臣坐王公由

殿左右門入位東西楹後大學士由

殿左門入位東楹王公後導從侍班各官不入八分
公以下文武百官就原立處咸跪行一叩禮坐尚
茶進

皇帝茶王公百官就所坐位行一叩禮乃

賜王以下文三品武二品以上暨外國陪臣茶受茶及
坐飲畢咸跪行一叩禮鑾儀衛官傳鳴鞭如初衆
皆興階下三鳴鞭

駕興中和韶樂作元旦奏和平之章

萬壽聖節奏泰平之章冬至奏允平之章

皇帝還宮樂止鴻臚寺官分引王公百官以次退禮部

儀制司官奉

殿上表及

午門外亭內直省文武官表送內閣咸退

右羣臣朝賀

是日內監豫設中和韶樂於

乾清宮檐下設丹陛大樂於

乾清門內

皇帝御太和殿受羣臣朝賀畢乘輿至

乾清宮檐前降輿中和韶樂作

樂章與外朝同

皇帝御座樂止

皇后率

皇貴妃

貴妃

妃

嬪禮服詣

乾清宮

皇后就正中拜位立

皇貴妃

貴妃

妃

嬪稍後左右立均北面丹陛大樂作奏鼙平之章行

六肅三跪三拜禮畢樂止各還後宮內監引

皇子

皇孫由東西階升就丹陛上東西拜位北面立東班

西上西班牙東上丹陛大樂作

樂章與外朝同

行三跪九叩

禮畢樂止退立兩旁東西面北上中和韶樂作

皇帝降座樂止

皇子

皇孫皆退

右內朝賀

若值

駐蹕熱河朝賀是日早鑾儀衛陳

法駕鹵簿於

澹泊敬誠殿前內監設中和韶樂於

澹泊敬誠殿檐下兩旁設丹陛大樂於

二門內兩旁亭內俱北向扈從各官俱蟒袍補服至

澹泊敬誠殿齊集鴻臚寺官引

皇子

皇孫和碩親王以下入八分公以上及蒙古王公至
階下兩旁按翼排立二品以上大臣在

二宮門外三品以下各官在

避暑山莊門外各照品級按翼排立禮部堂官奏請
皇帝具龍袍袞服

陞澹泊敬誠殿寶座中和韶樂作

樂章俱
同前

皇帝陞座樂止鑾儀衛官贊鳴鞭階下三鳴鞭鳴贊官
贊排班丹陛大樂作鴻臚寺官排班鳴贊官贊進

贊跪衆皆進跪贊叩興衆行三跪九叩禮鳴贊
官贊退俱復原位立樂止鑾儀衛官贊鳴鞭階下
三鳴鞭禮部堂官奏禮成中和韶樂作

皇帝還宮樂止衆俱出內監奏請

皇帝御內殿

陞座

皇后率

皇貴妃

貴妃

妃

嬪俱龍袍補服於

皇帝前行六肅三跪三拜禮禮成

皇帝起座

皇后

皇貴妃

貴妃

妃

嬪等還宮

右熱河朝賀

若值

行在所朝賀是日早扈從各官俱蟒袍補服於
行在宮之網城外齊集鴻臚寺官引

皇子

皇孫王公以下二品以上大臣至

皇帝行在宮網城內三品以下各官在網城外按翼排

立禮部堂官奏請

皇帝御行在宮正殿

皇帝御殿陞座鴻臚寺官引

皇子

皇孫王公文武各官行三跪九叩禮復原位立禮部

堂官奏禮成

皇帝還行在後宮衆俱退內監奏請

皇帝御內殿

陞座

皇后率

皇貴妃

貴妃

妃

嬪俱龍袍補服於

皇帝前行六肅三跪三拜禮禮成

皇帝起座

皇后

皇貴妃

貴妃

妃

嬪等還宮

右

行在朝賀

太和殿筵燕儀

凡元旦及

萬壽聖節及

大慶典前期禮部疏請舉行筵燕領侍衛內大臣奏請

命進酒大臣既得

旨乃徧布諸司供備屆日尚茶庀茶尚膳庀

御饌王以下入八分公以上進饌筵牲酒光祿寺供酒

席兩翼供羊辰刻

法駕鹵簿樂懸依次陳設於

太和殿笳吹隊舞雜伎百戲踈於

殿外東隅尚膳總領內管領豫於

寶座前設

御筵加黃幕武備院張黃幕於丹陛上正中內務府掌

儀司設反站於幕內尊爵金卮壺勺具禮部張青

幕於丹墀內鹵簿之後東西各八光祿寺每幕置

尊陳官饌具席皆有幕

右陳設

乃布席領侍衛內大臣內務府大臣禮部理藩院
尚書侍郎朝服視席布內外王公額駙台吉及入
班大臣等席於

殿內東西各七行席各四十有一東席西向當東楹
西席東向當西楹均北上

寶座左右布後扈大臣席各一稍後僉向

寶座前左右布前引大臣席各三東西相向

寶座後左右布領侍衛內大臣席各一又西布

日講起居注官席一均南向

殿門外西檐下布左都御史副都御史樂部大臣席

一東向丹陛左右布一二品大臣一二品世爵暨

侍衛席各三行席各二十有三東西相向東當東

懸之外西當西懸之外北上布禮部尚書侍郎席

一於黃幕左內務府總管席一於黃幕右丹墀左

右青幕內布三品以下文武百官席按翼為序如
常朝之位席各二十有四均東西向外國陪臣來
朝者席於西班之末東向

右布席

已刻內外諸王貝勒貝子公額駙台吉等朝服集
太和門外文武大臣百官朝服外國陪臣服本國服
集

午門外午刻鴻臚寺官引宗室王公暨大臣理藩院

官引外藩王公台吉在丹陛上又引文武百官在
丹墀內分翼序立禮部尚書奏請

御殿

皇帝禮服乘輿出宮前引後扈如常儀

午門鳴鐘鼓中和韶樂作奏隆平之章

皇帝降輿入

殿北門

陞御座樂止階下三鳴鞭鴻臚寺理藩院官分引內外

王公台吉暨入班大臣等由

殿左右門入就位行一叩禮坐鴻臚寺引一二品大臣暨一二品世爵侍衛等官就丹陛上又引三品以下文武各官就丹墀青幕內按翼依次於本位行一叩禮皆坐

右就位

迺進茶丹陛清樂作奏海宇昇平日之章尚茶暨侍衛執事官舉茶案以次由中道進至檐下進茶

官奉茶入

殿中門王以下咸就本位跪進茶官自

寶座中陞升跪進

皇帝茶興立於右王以下行一叩禮進茶官跪受茶甌

由右陞降出中門羣臣咸坐侍衛內務府護軍等

分

賜王以下文武百官暨外國陪臣茶各於坐行一叩禮

飲訖復叩坐尚茶徹茶案樂止

右進茶

尚膳總領護軍叅領內管領入

殿由東西陞升展

御筵幕執事官並徹王以下席幕各退迺進酒內務府
掌儀司官三人由黃幕內一人奉壺一人奉爵一
人執金卮以次進至

殿中門闕外之左西面立丹陛清樂作奏玉殿雲開
之章進爵大臣興離席釋補服王以下皆興進爵

大臣入

殿中門北面跪王以下咸於坐跪掌儀司官舉壺寶
酒於爵由中門入西面跪授爵興退進爵大臣奉
爵興自

寶座中陞升至

御前當右北面跪恭進

皇帝酒興由右陞降復位行一叩禮王以下皆隨行禮
進爵大臣興由右陞升跪受爵仍由中陞降復位

跪掌儀司官入跪受虛爵以退迺以金卮酌酒承
旨賜進爵大臣酒王以下起立掌儀司官入立授卮進
爵大臣受卮行一叩禮飲卒卮掌儀司官立受虛
卮退進爵大臣叩如初興王以下皆坐進爵大臣
出

殿右門加補服入席坐執事官分

恩賜果食於羣臣各於坐行一叩禮樂止

右羣臣奉觴上壽

迺進饌尚膳以饌入恭進於

皇帝前中和清樂作奏萬象清寧之章執事官分

恩賜肴饌於羣臣叩如前儀尚膳率屬舁反玷案至

殿中階下

御前侍衛酌酒升至

御座前

皇帝簡召王公大臣至

御前賜酒領侍衛內大臣東西各二人興離席視侍衛

行殿陞諸王大臣酒光祿寺官行丹墀青幕內文武各官暨外國陪臣酒王以下各就本位行一叩禮飲畢叩如初坐樂止

右行羣臣酒

是時禮部滿尚書侍郎率官屬引慶隆舞進司章東面奏歌司舞飾面具乘馬進揚烈舞司弦司箏司阮司司節司拍司拊諸樂人各奏其技喜起舞大臣十有八人朝服由

殿左門入詣正中跪三叩興退立於左循歌聲按對
起舞每對舞畢行三叩禮歌闕退又引歌筵吹樂
人入

殿歌畢又歌番部合奏樂歌畢內務府官引朝鮮國
俳入陳百戲畢咸退

右樂舞人侑

行酒畢樂舞退尚膳升徹

御筵降王以下咸起立王公大臣出

殿左右門鴻臚寺理藩院官引王公至丹陛拜位序
立引文武大臣降東西階丹墀內百官出幕咸就
東西拜位序立北面聽贊行一跪三叩禮丹陛大
樂作奏慶平之章禮畢樂止鳴鞭如初中和韶樂
作奏顯平之章

皇帝還宮樂止羣臣皆退所司徹席幕各退

右謝恩

冬至朝賀

崇德元年定長至進表慶賀不設宴

順治元年十一月戊申以

南郊禮成

上御殿受諸王貝勒及文武羣臣朝賀

八年定長至節於次日

御殿受賀如元日儀

康熙二年二月停止在外各衙門齋進冬至慶賀

表文

諭禮部曰冬至慶賀典禮明洪武十四年方定例舉行其
後隨令在外各衙門官齋進表文今思官員往返有誤
職掌且驛遞繁苦以後在外各衙門官員除元旦聖壽
節照舊齋進外冬至齋進慶賀表文著停止惟於本衙
門行禮其在京慶賀表文典禮仍照舊行

六年十一月丁未冬至戊申

御殿諸王羣臣上表慶賀以

世祖章皇帝配

天禮成

頒詔大赦

雍正元年十一月辛丑冬至壬寅

御殿受朝賀以

聖祖仁皇帝配

天禮成

頒詔天下先是禮部奏冬至次日受賀

頒恩詔禮儀

上諭大學士九卿等曰朕惟

聖祖仁皇帝大禮告成普天同慶朕陞殿頒布恩詔蓋以
賀

列祖之鴻禧慰萬方之誠悃也然朕思念

顧復深恩中心哀慕今未滿三年不忍陞殿受賀著內閣
九卿等詳察典禮酌古準今務期於禮允協庶朕心得
安大學士馬齊等奏言謹按漢禮儀云冬至之日宗祀
明堂登靈臺大赦百官稱賀此冬至配天行慶之

明文也自晉至唐宋皆隆其儀宋仁宗皇祐二年
以大慶殿為明堂合祭天地三聖並侑大慶禮成
百官奉表上賀其後仍之名曰慶成禮明會典載
大祀禮成次日御奉天殿受賀我

朝會典載冬至

南郊禮成次日

御殿百官進慶賀表臣等伏思先王制禮原以節情鉅
典攸宜古今不易懇祈

俯允禮臣所請以二十六日

御殿諸王羣臣上表行禮頌

聖祖仁皇帝配

天恩詔誠於典禮符協得

旨諸臣酌古準今詳察典禮具奏朕今亦難固却但朕中心實甚不安著允諸臣所請行

乾隆三年十一月庚申冬至壬戌

御殿受朝賀

臣等謹案是歲冬至次日辛酉係月十三日以值
聖祖忌辰改於十四日行禮

二十四年十一月庚戌冬至辛亥

御殿受朝賀以回部平定

頒詔中外

臣等謹案冬至朝賀禮儀亞於元日蔡邕獨斷謂
冬至陽氣起君道長故賀是也馬端臨朝儀一門
具載歷代元旦冬至朝會儀注緣其間有僅一見

者有不恒舉行者故特紀之以存一代之掌故焉
我

國家典章明備每歲元旦冬至令節禮臣奏請

臨御正殿王公百官及外國陪臣以次行禮中外一家
整齊嚴肅洵為往牒所未有固無庸循馬氏之例
一一臚列也茲惟恭載朔制更定諸大端及祇奉
諭旨遵行者以昭萬世之典則焉

皇朝文獻通考卷一百二十五